

**Date – 19/04/2024**

**Time - 7:30 -7:40Hrs**

**REGIONAL NEWS BULLETIN**

**HEADLINES (MORNING)**

- 1. Ram chhunga ro relna sang ber Parliament-a in pakhat zawk Lok Sabha-a Mizoram in aiawh a neih chhun thlang turin nichin mai, dar 7 atang khan vote neite'n boruak muanawm tak hnuaiah vote an thlak tan.**
- 2. Governor Hari Babu Kambhampati-a'n Lok Sabha member thlan vote thlak chhoh mekah vote nei zawng zawng te vote thlak theuh turin a sawm.**
- 3. Nichin dar 7 atang khan Lok Sabha 18-na inthlan thawh khatna atan ram chhung hmun hrang hrangah vote thlak a ni.**
- 4. Defence Research and Development Organisation (DRDO) chuan hlawhtling takin India siam missile a enchhin.**

<><><>

**LS Polling Day**

**Ram chhunga ro relna sang ber Parliament-a in pakhat zawk Lok Sabha-a Mizoram in aiawh a neih chhun thlang turin nichin mai, dar 7 atang khan vote neite'n boruak muanawm tak hnuaiah vote an thlak tan.**

**Polling Station 1,276 a inthlan buaipuitu tur, Polling party-te pawh inpeihfel tawhin vawiin vote thlak ni-a duty tur hian Polling Official ruat mi 5,071 an awm a ni.**

**Electoral Roll thar berin a tarlan dan chuan Mizoramah vote nei mi Nuai 8 Sing 5 Sang 6 leh 364 an awm a; heng zinga Nuai 4 Sing 1 Sang 4 leh 805 hi mipa niin, hmeichhia Nuai 4 Sing 4 Sang 1 leh 559 an awm a, Service voter mipa 4,872, hmeichhia 91, an vaiin 4,963 an awm bawk. Kum 85 chung lam voter 4741 (Mipa - 2167, Hmeichhia - 2574) awmin PwD voters 3397 (Mipa - 1876, Hmeichhia - 1521) an awm a, young voter, kum 18 leh 19 mi 36,370 (Mipa - 18,659, Hmeichhia - 17,711) an awm bawk a ni.**

**Polling Station 1276 zingah hian Thingtlang (Rural) Polling Station 751 leh Khawpui (Urban) Polling Station 525 a awm a, Polling Station hi hmun hrang hrang 1166-ah siam a ni a. Chawhrualin Polling Station pakhatah voter 671 zel an awm a, Polling Station 765-ah Polling Booth-a chet velna te webcasting kal tlanga vil a ni.**

**Vulnerable Polling Station 14 (Kolasib District - 7, Aizawl District - 3, Champhai District - 4), Critical Polling Station 5 (Saitual District vek), Lirthei luh lohna, kea pan ngai Polling Station 11 (Mamit District - 6, Lunglei District - 4, Lawngtlai District - 1) leh Lawngleng hmanga pan ngai Polling Station 15 (Lunglei District - 13, Mamit District - 2) a awm bawk.**

Puan tawh thin angin tun tum inthlanah hian candidate 6 an awm a. State-a ro rel lai ZPM Candidate Pu Richard Vanlalmangaiha te, Indian National Congress (INC) candidate Pu Lalbiakzama, MNF Candidate Pu K. Vanlalvena, BJP candidate Pu Vanlalmuaka leh MPC candidate Rita Malsawmi te bakah Independent-a ding Pu Lalhriatrenga Chhange te an ni.

Akashvani Regional News Unit chuan vawiin hian Lok Sabha inthlan pual hian 'special bulletin' a tichhuak dawn a. Chanchin thar puan hun pangngai zing dar 7.30, tlai dar 6.30 leh Headlines News puan thin bakah chawhma dar 10, dar 12, dar 2.30 leh tlai dar 4 ah te chanchin thar, vote tlak dan thar ber te minute 5 chung puan thin a ni dawn a. Hei bakah hian zan dar 8 leh min 2-ah inthlan vote thlak chungchang sawihona tihchhuah a ni ang.

<><><>

## LS Poll

Tun inthlanpuia vote nei awm tamna ber chu Aizawl District niin voter Nuai 2 Sing 8 Sang 8 leh 304 an awm a, vote nei awm tlemna ber District chu Hnahthial District niin voter Sing 1 Sang 6 leh 223 an awm a. Polling Station-a elector tamna ber chu Zemabawk-VIII (Aizawl District) niin elector tlemna ber chu Thehlep (Lunglei District) a ni.

Tun dinmunah inthlan duty tur leh EVM/VVPAT khawl indaih loh na a awm lova, EVM bakah VVPAT (Voter Verifiable Paper Trail) hi Polling Station 1276-ah hman a ni leh dawn a. Tun tum inthlanpuiah hian ECIL siam M3 Model thar ber Ballot Unit 1994, Control Unit 1958 leh VVPAT 2088 hman a ni ang.

Vote thlak zawh fel hnua EVM dahna tur Strong Room chu District tinah ruahman fel vek tawh a ni a. Strong Room hi 40 (Assembly Constituency tin tan pakhat theuh) awmin Central Armed Police Forces (CAPF) ten Strong Room kawngkhar bulah chhunzan zawmin an veng ang a, Mizoram State Armed Police te pawhin Strong Room awmna building hi chhunzan zawmin an veng dawn bawk a ni.

Venhimna lam thawk turin State Police personnel 3553 bakah Central Armed Police Forces (CAPF) Company 12 an duty dawn a. Flying Squad Team (FST) 83 awmin Static Surveillance Team (SST) 81 an awm a, Check Post (Nakas) 52 siam niin heng zinga 12 hi Inter-State Boundary-ah an awm a, a bak zawng hi State chung hmun hrang hrangah dah a ni. MCC puan a nih atanga April ni 15, 2024 thlenga zu leh ruihhlo man hlut zawng chu Cheng Vbeh 4 Nuai 79 Sing 8 Sang 4 leh 35 a tling tawh a. Silai 8 leh a mu thahnem tak bakah leh Geletin 110 leh Detonator 110 man a ni tawh bawk. CAPF company 5 (CRPF vek) chu inthlan zawhah Strong Room leh Counting Centre te veng turin Mizoramah an cham tlang ang a, a bak company 7 (CRPF - 2, BSF - 2, ITBP - 3) chuan State dang Inthlanpuia duty turin poll day zawh hian Mizoram an chhuahsan thung ang.

Kum 85 chunglam leh PwD voter te zingah in lama vote thlak duh tan Home Voting kalpui a ni a, mobile polling team ten an chenna inah kalchilhin vote thlaktir an ni. Mizoram pumah tun thla ni 4 leh 15 inkar khan Home Voting hi kalpui a ni a. Kum 85 chunglam mi 1792 leh PwD voter mi 317 ten vote an thlak a ni.

Vote thlak ni a vote tlak dante hi darkar 2 dan zelah Pollstar App kaltlanga report zung zung tura ruahman a ni a, inbiakpawh harsatna hmunah erawh MPRO kaltlanga chanchin inhrilhhriat tum niin, District tina Control Room-ah Pollstar Nodal Officer leh official dang bakah MPRO Team an duty vek dawn a ni.

<><><>

#### APPEAL TO VOTERS

Governor Hari Babu Kambhampati-a'n Lok Sabha member thlan vote thlak chhoh mekah vote nei zawng zawng te vote thlak theuh turin a sawm a, democracy kutpui hlu takah hian mi tinin an chanvo vote an thlak ngei a duhsak tih a sawi.

Governor chuan thalaite, a bikin vote nei thar an vote thlak vawi khatna tur te chu kim taka thawk chhuak turin a sawm a, vote a tlak that ngei a beisei thu a sawi baw. Mizoram chu state dang te nen tehkhinin lekhathiam tamna state a ni a, a chhunga cheng mipuite pawhin an dikna leh chanvo an hria a, an mawhphurhna pawh an hria a, hei vang hian vote thlak tura chhuak pawh an thehnem hle turah a ngai tih a sawi a ni.

Lok Sabha inthlanpui 2024-a Mizoram Parliamentary Constituency atana Returning Officer, Pi Nazuk Kumar-i pawhin Electoral Roll-a hming chuang Mizoram mipuite chu Mizoram aiawha Lok Sabha-a thu tur thlang theuh turin a sawm.

Pi Nazuk Kumar-i chuan state aiawh Lok Sabha rorelnaa ding tur thlan hi mawhphurhna pawimawh tak a nih thu a sawi a. Vawiina vote thlak thei dinhmuna vote neite an din theih nan hian thlahtu te leh ram hruaitu hmasa te'n harsatna tam tak hmachhawnin an lo bei tawh tih hriain, vote thlak theih hi a hlu a ni, a ti a. Thalai zawkte pawh vote thlak ngei tura sawmin, ram tan an pawimawh zia leh an vote a hlut thu a sawi.

<><><>

#### LOK SABHA ELECTIONS

Lok Sabha 18-na inthlan thawh khatna atan nichin dar 7 atang khan ram chhung hmun hrang hrangah vote thlak a ni.

Lok Sabha inthlan thawh khatna hi ram chhunga state leh UT 17-a bial 102-ah buatsaih mek a ni a. Lok Sabha inthlan thawh khatnaah hian chuhtu 1625 an awm a ni.

Lok Sabha inthlan thawh khatna hi Arunachal Pradesh, Meghalaya, Mizoram, Nagaland, Sikkim, Andaman and Nicobar Islands, Lakshadweep, Puducherry, Uttarakhand leh Tamil Nadu-a Lok Sabha bial awm zawng zawngah buatsaih a ni a. Heng bakah hian Rajasthan-a bial 12, Uttar Pradesh-a bial 8, Madhya Pradesh-a bial 6, Assam leh Maharashtra-a bial 5 ve ve, Bihar-a bial 4, West Bengal-a bial 3, Manipur-a bial 2 leh Chhattisgarh, Tripura leh Jammu and Kashmir-a bial khat theuhah buatsaih a ni baw.

Lok Sabha inthlan thawh khatna rual hian Arunachal Pradesh leh Sikkim-ahte Legislative Assembly inthlan buatsaih a ni baw a ni.

Lok Sabha inthlana vote tlate hi a zavaiin June ni 4-ah chhiar a ni ang.



## **DRDO CONDUCTED INDIGENOUS CRUISE MISSILE TEST SUCCESSFULLY**

**Defence Research and Development Organisation (DRDO) chuan niman khan India siam missile, Indigenous Technology Cruise Missile (ITCM) chu Odisha vaukam atangin hlawhtling takin a enchhin.**

**India missile hi Chandipur-a Integrated Test Range (ITR) atangin enchhin a ni a. He missile enchhinna hian beisei lawk ang a pha vek a ni.**

**Defence Ministry sawi danin missile enchhin hi Indian Air Force thlawhtheina Su-30-Mk-I atangin thunun a ni.**

**Defence Minister Rajnath Singh-a chuan hlawhtling taka missile an enchhin avangin DRDO chu a lawmpui thu a sawi.**



## **FSSAI EXAMINING REPORT ON ADDED SUGAR IN NESTLE BABY FOOD PRODUCTS**

**Food Safety and Standards Authority of India (FSSAI) chuan naute hnek tur Nestle-a chini an telh ni-a sawi chu an endik.**

**An endikna chu mithiam rual (Scientific panel) hmaa pharh leh tur a nih thu thudawna chuan a sawi a. Hetianga endik a nih chhan hi Swiss Investigative Organisation-in Company chuan nausen leh naute kum 2 tling chin hnek tura a siam hnute-ah chini an telh ni-a a sawi vang a ni.**

**Thudawnnain a sawi danin, ram rethei leh ram vantlanga hralhchhuah tur, naute hnek tura siam hnute-ah hian chini telh a ni a. Hetihlai hian, hemi naute hnute hnek tura siam tho, ram hausaa hralh turah chuan chini chu telh ve a ni lo tih a ni bawk.**

